

Broj: 01-11-12-996-9/24  
Sarajevo, 26.06.2024. godine

Na temelju člana 70. stav (4) Zakona o javnim nabavkama („Službeni glasnik BiH“, br. 39/14 i 59/22), a vezano za otvoreni postupak javne nabavke usluga - „Održavanje Mreže permanentnih stanica (FBIHPOS) - Telekomunikacijske usluge“, predviđen Planom nabavki za 2024. godinu, broj: 01-11-12-399/24 od 22.02.2024. godine, te preporuke Komisije za provođenje predmetnog postupka javne nabavke, date u Zapisniku o ocjeni ponuda, broj: 01-11-12-996-8/24 od 26.06.2024. godine, direktor Federalne uprave za geodetske i imovinsko-pravne poslove, d o n o s i

## **ODLUKU**

### **o poništenju postupka javne nabavke usluga - „Održavanje Mreže permanentnih stanica (FBIHPOS) - Telekomunikacijske usluge“**

#### **I**

Ovom Odlukom u cijelosti se poništava otvoreni postupak javne nabavke usluga - „Održavanje Mreže permanentnih stanica (FBIHPOS) - Telekomunikacijske usluge“, predviđen Planom nabavki za 2024. godinu, broj: 01-11-12-399/24 od 22.02.2024. godine, za koji je Obavještenje o nabavci broj: 399-1-2-12-3-14/24 objavljeno na web Portalu Agencije za javne nabavke BiH dana 16.05.2024. godine.

#### **II**

LOT 1 predmetnog postupka javne nabavke se poništava u skladu sa članom 69. stav (2) tačka d) Zakona o javnim nabavkama, iz razloga što je ponuda ponuđača Logosoft d.o.o. Sarajevo za LOT 1 ocijenjena kao neprihvatljiva, a u vezi odredbi člana 57. stav (1), te člana 68. st. (1) i (4) tačke c), f), i) Zakona.

LOT 2 i LOT 3 predmetnog postupka javne nabavke se poništavaju iz razloga što u određenom krajnjem roku nije dostavljena nijedna ponuda, a temeljem obaveze ugovornog organa propisane članom 69. stav (2) tačka a) Zakona.

#### **III**

Ova Odluka stupa na snagu danom donošenja i objavit će se na službenoj internet stranici Federalne uprave za geodetske i imovinsko-pravne poslove - [www.fgu.com.ba](http://www.fgu.com.ba).

#### **IV**

Protiv ove Odluke može se izjaviti žalba Uredu za razmatranje žalbi BiH, putem ugovornog organa - Federalna uprava za geodetske i imovinsko-pravne poslove, u roku od 10 (deset) dana, i to u pisanoj formi i u dovoljnom broju primjeraka, a koji ne može biti manji od tri (3).

## Obrazloženje

Na temelju Zakona o javnim nabavkama („Službeni glasnik BiH“, br. 39/14 i 59/22) i Plana nabavki za 2024. godinu, broj: 01-11-12-399/24 od 22.02.2024. godine, Federalna uprava za geodetske i imovinsko-pravne poslove (u daljem tekstu: ugovorni organ) je Odlukom o nabavci, broj: 01-11-12-996/24 od 14.05.2024. godine, pokrenula otvoreni postupak javne nabavke usluga - „Održavanje Mreže permanentnih stanica (FBIHPOS) - Telekomunikacijske usluge“, u skladu sa tenderskom dokumentacijom i Obavještenjem o nabavci, broj: 399-1-2-12-3-14/24 od 16.05.2024. godine.

Postupak je provela Komisija za javnu nabavku (u daljem tekstu: Komisija) imenovana Rješenjem direktora Federalne uprave za geodetske i imovinsko-pravne poslove, broj: 01-11-12-996-1/24 od 14.05.2024. godine, koja je o istom sačinila Zapisnik o zaprimanju ponuda, broj: 01-11-12-996-4/24 od 05.06.2024. godine, Zapisnik o otvaranju ponuda, broj: 01-11-12-996-5/24 od 05.06.2024. godine i Zapisnik o ocjeni ponuda, broj: 01-11-12-996-8/24 od 26.06.2024. godine.

U skladu sa tenderskom dokumentacijom i Obavještenjem o nabavci sa web Portala Agencije za javne nabavke BiH, dana 05.06.2024. godine u 10:30h, na adresi ovog ugovornog organa, bez prisustva predstavnika ponuđača, izvršeno je javno otvaranje blagovremeno dostavljenih ponuda, i to:

1. LOT 1 - Logosoft d.o.o. Sarajevo
2. LOT 2 - bez ponuda
3. LOT 3 - bez ponuda

Po predmetnom nadmetanju, Komisija je ustanovila da je do roka utvrđenog tenderskom dokumentacijom i obavještenjem o nabavci dostavljena ukupno jedna (1) ponuda i to za LOT 1 predmetne nabavke usluga, od strane ponuđača Logosoft d.o.o. Sarajevo, dok za LOT 2 i LOT 3 nije bilo dostavljenih ponuda.

Detaljnim pregledom i analizom ponude ponuđača Logosoft d.o.o. Sarajevo za LOT 1, Komisija je utvrdila da ista ne ispunjava sve uvjete propisane tenderskom dokumentacijom, te je u skladu sa članom 2. stav (1) tačka I) pod 2) ZJN zaključila sljedeće:

1. Ponuda ponuđača Logosoft d.o.o. Sarajevo za LOT 1 se **odbija kao neprihvatljiva**, obzirom da ne ispunjava kriterije za kvalifikaciju privrednog subjekta u dijelu tačaka 5.4.1. pod a) i 5.4.2. pod a) tenderske dokumentacije (tehnička i profesionalna sposobnost ponuđača). Naime, Komisija je na početku evaluacije predmetne ponude poduzela sljedeće:
  - U skladu sa članom 44. stav (1), članom 48. stav (5), te članom 68. stav (3) Zakona o javnim nabavkama, od ponuđača Logosoft d.o.o. Sarajevo je aktom, broj: 01-11-12-996-7/24 od 06.06.2024. godine, zatraženo pojašnjenje dostavljene ponude za LOT 1 u pogledu tačke 5.4.1. pod a), te izjave iz tačke 5.4.2. pod a) tenderske dokumentacije, obzirom da je u toku pripreme ovog postupka javne nabavke prethodno izvršeno prikupljanje svih relevantnih informacija i istraživanje tržišta sa tehničkog aspekta predmetne nabavke, te je u tom smislu Komisija prikupila informacije da ne postoje tehničke mogućnosti od strane ponuđača Logosoft d.o.o. Sarajevo za realizaciju vršenja usluga za LOT 1 na lokaciji objekta ovog ugovornog organa u skladu sa navedenim tačkama tenderske dokumentacije;
  - U odgovoru na zahtjev za pojašnjenje ponude, broj: 268/24 od 11.06.2024. godine, ponuđač Logosoft d.o.o. Sarajevo je dostavio nejasne i kontradiktorne informacije vezane za tačku 5.4.1. pod a) tenderske dokumentacije, u odnosu na izjavu uz ponudu

iz tačke 5.4.2. pod a) tenderske dokumentacije, a vezano za traženi uvjet koji tenderskom dokumentacijom propisan na sljedeći način: „Ponuđač mora imati pristup ili biti vlasnik mreže kojom će se pružati usluge na definiranim lokacijama, bez potrebe izvođenja radova na kablovskoj kanalizaciji (za LOT 1, LOT 2 i LOT 3);“. Naime, izjavom o ispunjavanju uvjeta iz tačke 5.4.1. pod a) tenderske dokumentacije, ponuđač je naveo sljedeće: „Također, potvrđujemo da se se internet vezu Logosoft d.o.o. Sarajevo može realizovati bez potrebe izvođenja na kablovskoj instalaciji“, dok je međutim u odgovoru na zahtjev za pojašnjenje ponude, broj: 268/24 od 11.06.2024. godine, ponuđač dostavio sljedeću informaciju: „Optička infrastruktura našeg Društva izvedena je pored navedenog objekta/parcele, pa bi se optički privod do Vaše server sobe izveo za par sati, a i samim tim kompletna uspostava internet konekcije u skladu sa tehničkom specifikacijom koja je sastavni dio Tenderske dokumentacije.“;

- S tim u vezi, a imajući u vidu da se data izjava iz ponude, te dostavljena informacija iz zahtjeva za pojašnjenje ponude ne podudaraju i nejasni su, a zapravo u većem dijelu su u suprotnosti jedna s drugom, Komisija je aktom, broj: 01-11-12-996-7/24 od 18.06.2024. godine, uputila novi dopis sa zahtjevom za pojašnjenje ponude i dostavljenih navoda obzirom da prvobitni odgovor ponuđača Logosoft d.o.o. Sarajevo nije sadržavao sva potrebna pojašnjenja i dokaze tražene prvobitnim zahtjevom za pojašnjenje ponude, te u isto vrijeme zatražila da se uz dodatno pojašnjenja o eventualnoj potrebi izvođenja radova dostavi i izvod iz katastra podzemnih instalacija (katastra komunalnih uređaja) kao dokaz posjedovanja pristupa ili vlasništva za optičku instalaciju na adresi ovog ugovornog organa, a kako bi se precizno i nedvosmisleno razjasnile sve okolnosti u kontekstu ispunjavanja uslova tehničke i profesionalne sposobnosti iz tačke 5.4.1. pod a) tenderske dokumentacije, a u vezi člana 48. i 50. Zakona o javnim nabavkama;
- Aktom, broj: 276/24 od 24.06.2024. godine, kao odgovorom na ponovljeni zahtjev za pojašnjenje ponude, ponuđač Logosoft d.o.o. Sarajevo navodi sljedeće: „Kompanija Logosoft d.o.o. je nedavno izvela neophodne radove na izgradnji optičke infrastrukture u ulici Hamdije Kreševljakovića. Projektom je predviđena izgradnja odvojka za zgradu u kojoj se nalazite. Odvojak, koji zahtijeva minimalne radove, bio bi izgrađen na parceli na kojoj je Vaš objekat. Odvojak je moguće uraditi jedino uz Vaše odobrenje pa ovim putem tražimo Vašu saglasnost za izgradnju istog. Izrada elaborata izvedene trase je u toku i isti će se nadležnoj instituciji predati u što skorije vrijeme.“.

Iz prethodno navedenog, Komisija je zaključila da ponuđač Logosoft d.o.o. Sarajevo ne ispunjava uslov iz tačke 5.4.1. pod a) tenderske dokumentacije, odnosno da je izjavom uz ponudu zapravo dao informacije koje ne odgovaraju stvarnom stanju na terenu, čime je potvrđena sumnja Komisije da navedeni ponuđač u ovom trenutku ne posjeduje internetski priključak na objektu ovog ugovornog organa, a da uspostavljanje istog ipak zahtijeva određene radove, davanje saglasnosti i izradu elaborata, što je potpuno u suprotnosti s onim što je propisano i zahtijevano tenderskom dokumentacijom u pogledu traženog tehničkog uslova. Također, Komisija je primjetila da je ponuđač Logosoft d.o.o. Sarajevo u svom drugom odgovoru, broj: 276/24 od 24.06.2024. godine, propustio da dostavi traženi izvod iz katastra podzemnih instalacija (katastra komunalnih uređaja) kao dokaz pristupa ili vlasništva optičke instalacije na adresi ovog ugovornog organa, te je Komisija konstatovala da u ovom trenutku navedeni ponuđač ne ispunjava uslov propisan tačkom 5.4.1. pod a) tenderske dokumentacije, kao i date izjave iz tačke 5.4.2. pod a) tenderske dokumentacije, a u pogledu zahtijevanog uslova kojim se od ponuđača traži **pristup ili vlasništvo nad mrežom kojom će se pružati usluge na definiranim lokacijama, bez potrebe izvođenja radova na kablovskoj kanalizaciji**, pa je Komisija ocijenila da ponuda ponuđača Logosoft d.o.o. Sarajevo za LOT 1 u skladu sa članom 2. tačka l) pod 2) Zakona nije prihvatljiva i ne ispunjava sve uvjete iz tenderske dokumentacije, a u kontekstu tehničke i profesionalne sposobnosti ponuđača iz člana 48. i 50. Zakona o javnim nabavkama.

U tom smislu, tačkom 10. Zapisnika o ocjeni ponuda, broj: 01-11-12-996-8/24 od 26.06.2024. godine, Komisija je direktoru Federalne uprave za geodetske i imovinsko-pravne poslove jednoglasno predložila da se u skladu sa odredbama člana 57. stav (1), te člana 68. st. (1) i (4) tačke c), f), i) predmetna ponuda ponuđača Logosoft d.o.o. Sarajevo za LOT 1 odbije kao neprihvatljiva, te LOT 1 predmetnog postupka nabavke usluga poništi imajući u vidu obavezu propisanu članom 69. stav (2) pod d) Zakona o javnim nabavkama.

Vezano za LOT 2 i LOT 3 gdje do određenog roka za dostavu ponuda nije zaprimljena niti jedna ponuda, Komisija je predložila, a ugovorni organ prihvatio, da se i u ovom slučaju u skladu sa članom 69. stav (2) pod a) donose odluka o poništenju LOT-a 2 i LOT-a 3, te se samim tim otvoreni postupak javne nabavke usluga – „Održavanje Mreže permanentnih stanica (FBIHPOS) - Telekomunikacijske usluge“ u cijelosti poništava.

U postupku ocjene provedenog postupka, ugovorni organ nije našao razloge nepravilnosti, niti propuste u radu, a koji bi eventualno bili osnov za neprihvatanje preporuke Komisije date u Zapisniku o ocjeni ponuda, broj: 01-11-12-996-8/24 od 26.06.2024. godine, pa je ovaj ugovorni organ, uzimajući u obzir naprijed navedene okolnosti i utvrđene činjenice, odlučio kao u dispozitivu ove Odluke.

  
**DIREKTOR**  
Željko Obradović, dipl.ing.geod.

**Prilog:** Zapisnik o ocjeni ponuda

**DOSTAVITI:**

1. Logosoft d.o.o. Sarajevo;
2. Sektor za geoinformatiku - o v d j e;
3. U spis.

4